

Corte:

Esteban Valles bek na timon di Aruba Airlines

ORANJESTAD (AAN): Despues di mas o menos 10 dia cu Corte a pensa y evalua e caso, diaranson mainta a duna su sentencia den e caso cu e compania Seastar Holding a entama contra Onno de Swart y Gabri de Hoogd. Cu e sentencia aki, Onno de Swart ta keda suspendi for di tur su funcionnan y trabounan den Aruba Airlines te dia cu e caso tuma luga den Bodemprocedure.

Abogado mr. Geert Rep a defende interes di Seastar Holding cu ta representa 90% di e accionnan den e compania Aruba Airlines mientras cu abogado mr. Helen Lejuez a defende Onno de Swart




y abogado mr. Lalo Croes a defende Gabri de Hoogd. Mester menciona cu na Corte a señala abogado mr. Monica Kock cu tambe a representa e doño di Aruba Airlines y abogado mr. Dello Gomez cu a representa e compania cu ta "lease" e avionnan na Aruba

Airlines. Den e sentencia cu Hues a dicta diaranson mainta el a suspende Onno de Swart di tur funcion den e aerolinea y ta prohibi'e di eherce cualkier accion den nomber di Aruba Airlines, te ora cu e reunion di accionistanan dicidi otro. Corte a ordena Onno de Swart pa no tene su mes activo cu Aruba Airlines y pa cancela tur apoderacion cu e tabatin of cu e lo a duna na otro nan.

Na mes momento Corte a nombra Esteban Valles como director interino di Aruba Airlines te ora cu e reunion di accionistanan dicidi diferente. Tambe Corte ta apodera Valles pa e inscribi su mes como director di e compania den tur registro oficial, manera na Camara di Comercio.

Tambe Corte a apodera e compania Seastar pa yama un reunion di accionistanan y pa oficialisa un ke otro cu el a dicidi den su sentencia. Na final, Hues a ordena Onno de Swart pa den 24 ora di tempo, e deponer e "aandeelhoudersregister" original di Aruba Airlines na Notario Ralph Yarzagaray y pa



e apodera Seastar pa cancela e cambionan haci di dia 2 di februari ultimo te dia cu bin un sentencia den e caso den Bodemprocedure. Awor, e mesun Hues mr. W. Noordhuizen a dicta cu, mirando cu el a ordena

Onno de Swart y Gabri de Hoogd pa cumpli cu un lista di rekisitonan, cu si nan no cumpli den 24 ora di tempo, cu por impone un multa di 25 mil florin pa cada dia of parti di dia cu no cumpli, te cu un maximo di 25 mion florin!